

欽定全唐文

欽定全唐文卷八百四十七目錄

封翹

請入閣次對奏

敬天愛民疏

請行封建疏

請答謝神祠疏

康澄

詳斷楊漢賓奏

陳政事疏

韓彥惲

拾補議

崔衍

乞省請左魚歸郡契合奏

鄭珏

請追尊先代奏

趙都

上唐莊宗疏

李嚴

笏記

李琪

奉迎車駕還京奏

請行開成格奏

陳經國事疏

請更定朔望入閣奏對疏

謝朱梁祖大硯瓦狀

不應改國號議

請准馬縞奏卽令撰謚冊議

長蘆崇福禪寺僧堂上梁文

梁啓聖匡運同德功臣淮南鎮海鎮東等軍節度
使淮南浙江東西等道觀察處置營田招討安
撫兼鹽鐵制置發運等使開府儀同三司尚父
守尚書令揚杭越等州大都督府長史上柱國
吳越王錢公生祠堂碑

欽定全唐文卷八百四十七

封翹

翹舜卿從子梁貞明中爲翰林學士後唐天成中爲給事中

請入閣次對奏

竊見五日轉對於事太繁所見或有短長不當空煩聖覽
請此後祇於入閣者依刑法待制官例次對

敬天愛民疏

天地之經陰陽之數莫不上規帝道旁體物情儻國人偶

有其咎嗟則時令必爲之差忒如陛下英明御宇勤儉臨朝推泣辜罪己之心行解網納隍之道無偏無黨憲章不濫於雷霆克寬克仁霈澤嘗均於雨露致君己及於堯舜勃興尋竝於禹湯則合災星退於三移瑞日呈於五色焉有自冬徹臘啓歲經春陰雲多蔽於長空滯雨頻霑於連日豈是未臻聖政不降靈休旣難喻於元穹須更增於隆德伏乞稍畱聖念明下所司俾郊壇祠祭之儀簠簋馨香之料尤加清潔倍致敬恭罪非刲殺旋令疎放亡歿卿士希加賙贈農桑藉力之時務蠲大役禽鳥營巢之際禁斷

網羅恭祈十雨五風以卜千秋萬歲詔付所司詳酌施行

請行封建疏

臣聞立愛惟親教民以睦實大朝之重事乃有國之通規
是知維城爲國本之資磐石作安宗之計所以興隆鴻業
保定皇家伏惟陛下天祚丕基日新聖德使九功之咸敘
致百度以維貞塹典皆修遺文必舉獨於封建未覩宣行
旣尚抑於龍樓宜且遵於麟趾乞命親賢以資夾輔

請答謝神祠疏

星辰合度風雨應時將修賽謝請以御前香一合聖上親

藝一炷餘者卽令分於所謝答廟中焚之貴表精至庶賢聖感通

康澄

澄後唐明宗朝官大理少卿

詳斷楊漢賓奏

楊漢賓早列偏裨曾分茅土事若先於恕己理不在於尤人豈可忘姻姪之舊情憑官資之威力遽因毆擊顯致訟論自歸有過之門須舉無偏之道合該議減亦舉律文其漢賓前任黔南節度使是三品使關入議准律減一等杖

九十准名例律官少不盡其罪餘罪收贖罪少不盡其官
畱官收贖其楊漢賓所犯罪杖九十准律贖銅九斤准格
每斤納錢一百二十文

陳政事疏

臣聞安危得失治亂興亡誠不繫於天時固匪由於地利
童謠非禍福之本妖祥豈隆替之源故雊雉昇鼎桑穀生
朝不能止殷宗之盛神馬長嘶玉龜告兆不能延晉祚之
長是知國家有不足懼者五深可畏者六陰陽不調不足
懼三辰失行不足懼小人訛言不足懼山摧川涸不足懼

蠭賊傷稼不足懼此不足懼者五也賢人藏匿深可畏四
民遷業深可畏直言蔑聞深可畏羞恥道消深可畏毀譽
亂真深可畏直言蔑聞深可畏此深可畏者六也伏惟陛
下尊臨南國奄有八紘蕩三季之澆風振百王之舊典設
四科而羅俊彥提五柄以御英雄所以不軌不物之徒咸
思革面無禮無義之輩相率悛心然而不足懼者願陛下
存而無論深可畏者願陛下修而靡忒加以崇三綱五常
之教敷六府三事之歌則鴻基與五嶽爭高盛德共磐石

永固

韓彥惲

彥惲後唐長興元年官禮部尚書

祫禘議

伏以三年祫而五年禘遂古通規祖有德而宗有功前王令範始封爲百代之主親盡從羣廟之祧繇是昭穆固差尊卑式敘標諸前典是謂格言我國家土德中興瑤圖再造旣展郊禋之禮爰崇禘祫之儀典冊備陳孝思無極恭以本朝尊受命之祖景皇帝爲始封之君百代不遷累朝頻議自貞觀至於天祐無所改移聖祖神孫左昭右穆洎

經兵革久廢烝嘗蕪沒宮庭陸沉園寢迨中興國祚重立宗祊議出一時制行七廟遂致太祖景皇帝在祧廟之數不列祖宗伏惟聖明神武文德恭孝皇帝陛下紹復鴻圖不失舊物欲尊太祖之位將行東向之儀爰命羣臣畢同集議伏詳本朝列聖之舊典明皇定禮之新規開元十年特立九廟子孫遵守歷代無虧今旣行七廟之規又以祧太祖之室昔德宗朝行禘祫之禮顏真卿立議請奉獻祖神主居東向之位景皇帝暫居昭穆之列考之於貞元則以爲誤引之說行之於今日雅得其變禮之宜今欲請每

遇禘祫之歲暫奉景皇帝居東向之尊自元皇帝已下敘
列昭穆羣寮聚議貴在酌中臣等周行咸非博識循其故
事庶叶典章

崔衍

衍後唐長興元年官給事中

乞省請左魚歸郡契合奏

當省給納諸州銅魚勘問本行令史狀稱內庫每州有銅
魚八隻一隻大七隻小兩隻右五隻左其右銅魚一隻長
畱在內畱一隻在本州庫逐季申報平安左魚五隻皆鑄

次第字號每新除刺史到郡後卽差人到當省請領左魚當司覆奏內庫次第出給左魚一隻當省責領分付到州集官吏取州庫右魚契合卻差人送左魚納省如別除刺史州司又請次第左右周而復始臣以州司差人請魚往來須有煩費請此後所除刺史在京受命或經過都城者可令自牒當省請左魚齋歸本郡契合然後差人納省所冀稍免煩勞

鄭珏

珏唐宰相繁諸孫光化中舉進士厯官監察御史入梁累

遷禮部侍郎貞明中拜中書侍郎同中書門下平章事後
唐莊宗入汴貶萊州司戶參軍復召爲太子賓客明宗卽
位拜平章事尋以開府儀同三司行尚書左僕射致仕長
興初卒贈司空

請追尊先代奏

恭以皇帝陛下特降睿慈俯詢輿議尊厯朝之正典允多
士之虔祈廣溥天孝治之風慰萬國仁親之道臣聞自古
英主入紹洪基莫不慎固遠圖凝思往事敬宗尊祖追養
存誠廣殊號於園陵展異儀於壇紱春秋殷薦霜露永懷

又聞兩漢以諸侯王入繼帝統則必易名上諡廣孝稱皇
載於諸王故事孝德皇孝仁皇孝元皇是也伏冀聖慈猥
從人願許取皇而薦號兼上諡以尊名改置園陵仍增兵
衛

趙都

都鄴中人赴鄉薦時鄭珏知貢舉都納賂於珏遂登第

上唐莊宗疏

無以有威以自大無以足兵以自安無以奇技悅情無以
淫聲惑志非社稷之功乞不加於厚賞非股肱之力乞不

近於凝旒審內帑之豐虛削無名之經費左右處卑者乞見之有節伶倫濫吹者乞減於盈廷至於畋遊馳騁之娛蹴踴飛馳之樂伏乞大寶大位戒以奔車

李嚴

嚴幽州人本名讓坤初仕燕爲刺史後唐同光中爲客省使三年奉使於蜀知蜀可伐贊成其謀及伐蜀爲三川招討使蜀平遷泗州防禦使兼客省使如故長興初授西川兵馬都監爲孟知祥所害

笏記

伏自朱溫肆逆運屬昭宗三年痛別於西秦一旦逼遷於東洛誅殘南北焚爇宮闈雖列藩悉是其唐臣無一處不從其僞命由是大唐中興皇帝念高祖太宗之業倏爾隳弛憤朱溫崔允之徒同謀篡弑遂乃神機迥發心鼎獨燃掘滄溟而誓戮鯨鯢芟林莽而決除虎兕十年對壘萬陣交鋒慮久困於生靈而選挑其死士纔過汾水縛王鐵槍於馬前旋及夷門斬朱友貞於樓下劍霜未匣槍雪猶輝段凝統八萬雄師倒戈伏死趙嚴知一人應運引頸待誅遂使賊將寒心謀夫拱手取乾坤只勞於八日救塗炭遂

定於四方備振皇威咸遵帝力今則秦庭貢表兩浙稱臣
淮南陳附拜之儀迴紇備朝天之禮纔安宇宙便息干戈
未盡梟夷方議除翦豈謂大蜀皇帝柔遠懷邇居安慮危
嘉我帝祚中興羣妖悉滅特遣蘇張之士來追唐蜀之懼
吾皇迴感於蜀皇復禮遠酬於厚禮臣則叨承元造獲奉
皇華載馳得面於天顏戰汗不任於局地臣無任感恩荷
聖踴躍屏營之至

李琪

琪字台秀河西燉煌人少舉進士天復初應博學宏詞居

第四等累遷殿中侍御史入梁爲戶部侍郎翰林承旨貞
明龍德中厯兵禮吏侍郎遷御史中丞累擢尚書左丞中
書門下平章事罷爲太子少保後唐同光初授太常卿吏
部尚書三年爲國計使明宗卽位爲御史大夫除尚書左
僕射天成末明宗自汴遷洛爲東都畱司官以太子太傅
致仕長興中卒年六十

奉迎車駕還京奏

伏以陛下暫違清廟纔過周星初平作孽之守殷次戮不
臣之庭琬今者敗契丹之充黨破真定之逆城大振皇威

咸縣睿算臣等久違宸極俱戀聖恩恨不隨歌舞於汴郊
拜龍顏於梁苑豈可只於清洛坐俟迴鑾願於次舍之間
得展會同之禮庶傾就望咸竭歡呼臣等今乞於偃師東
排班迎駕稱賀後先赴雒陽東祇候

請行開成格奏

奉八月二十八日勅以大理寺所奏見管四部法書內有
開元格一十卷開成格一十一卷故大理卿楊邁所奏行
偽梁格并目錄一十一卷與開成格微有差舛未審祇依
楊邁先奏施行爲復別頒聖旨令臣等重加商較刊定奏

聞者今未若廢僞梁之新格行本朝之舊章遵而守之違者抵罪奉九月二十八日勅宜依李璵所奏廢僞梁格施行本朝格式者伏詳勅命未該律式伏以開元朝與開成隔越七帝年代既深法制多異且律有重輕格無二等若將兩朝格文允行復慮重疊差舛況法者天下之大信非一人之法天下人之法也故謂一成不變之制又准格文後勅合破前格若將開元與開成格之行實難檢舉又有大和格五十一卷刑法要錄五十卷格式律令事類四十卷大中刑法格後勅六十卷共一百六十一卷久不檢舉

伏請定其與奪奉勅宜令御史臺刑部大理寺同詳定一
件格施行者今衆集商量開元格多是條流公事開成格
關於刑獄今且請使開成格

陳經國事疏

臣聞王者富有兆民深居九重所重患者百姓凋耗而不
知四海困窮而莫救下情不得上達羣臣不敢指言今陛
下以水潦之災軍食乏闕焦勞罪已迫切疚懷避正殿以
責躬訪多士而求理則何思而不獲何議而不臧止在改
而行之足以擇其善者臣聞古人有言曰穀者人之司命

也地者穀之所生也人者君之所理也有其穀則國力備定其地則人食足察其人則徭役均知此三者爲國之急務也軒黃已前不可詳記自堯涇洪水禹作司空於時辨九等之田收什一之稅其時戶口一千三百餘萬定墾地約九百二十萬頃最爲太平之盛及商革夏命重立田制每私田十畝種公田一畝水旱同之亦什一之義也洎乎周室立井田之法大約百里之國提封萬井出車百乘戎馬四百匹畿內兵車萬乘馬四萬匹以田法論之亦什一之制也故當成康之世比堯舜之朝戶口蓋增二十餘萬

非他術也蓋三代以前皆量入以爲出計農以立軍雖逢水旱之災而有凶荒之備降及秦漢重稅工商急關市之征倍舟車之算人戶既以減耗古制猶以兼行按此時戶口尚有千二百餘萬墾田亦八百萬頃至乎三國並興兩晉之後則農夫少於軍衆戰馬多於耕牛供軍須奪於農糧秣馬必侵於牛草於是天下戶口只有二百四十餘萬消隋文之代兩漢比隆及煬帝之年又三分去一我唐太宗文皇帝以四夷初定百姓未豐延訪羣臣各陳所見惟魏徵獨勸文皇力行王道由是輕徭薄賦不奪農時進賢

良悅忠直天下粟價斗直兩錢自貞觀至於開元將及一千九百萬戶五千三百萬口墾田一千四百萬頃比之堯舜又極增加是知救人瘼者以重斂爲病源料兵食者以惠農爲軍政仲尼云百姓足君孰與不足臣之此言是魏徵所以勸文皇也伏惟深畱宸鑒如以六軍方闢不可輕徭兩稅之餘猶須重斂則但不以折納爲事一切以本色輸官又不以紐配爲名止以正耗加納猶應感悅未至流亡況今東作是時羸牛將駕數州之地千里運糧有此差徭必妨春種今秋若無糧草何以贍軍臣伏思漢文帝時

欲人務農乃募人入粟得拜爵及贖罪景帝亦如之後漢安帝時水旱不足三公奏請富人入粟得關內侯及公卿以下散官本朝乾元中亦曾如此今陛下縱不欲入粟授官願明降制旨下諸道合差百姓轉倉之處有能出力運官物到京師五百石以上白身授一初任州縣官有官者依資遷授欠選者便與放選千石以上至萬石不拘文武明示賞酬免令方春農人流散斯亦救民轉倉贍軍之一術也

請更定朔望入閣奏對疏

每月文明殿入閣及百官五日一赴中興殿等事伏准故
事每月百官入閣所司排儀仗金吾勘契入後有待制次
對官各舉論本司公事左右起居分記言動以付史館編
修帝錄此本朝經久之制也昨陛下初膺大寶思致治平
遂降綸言特申聖旨百官除常朝外依宰臣每五日一度
入內起居所貴得預敷陳俾凝庶績此蓋陛下切於百司
各言於時政特令五日一面於天顏雖眷睠以丁寧限朝
儀之拘束序班而入拜手而迴縱有公事要言亦且卷行
須出百司何由舉職兩史無以記言外則因此廢待制次

對之官內則無以分延英衆人之別以臣愚見竊有所陳
欲乞陛下每月一日十五日兩度出御文明殿排入閣之
儀諸司依前轉對奏論今司公事其百官就食謂之廊餐
則中外既有區分禁庭亦更嚴察如陛下切於羣臣所有
敷陳卽乞因宰臣五日一度延英之際班行內有要奏事
者臨門狀到便許引入此又於旅進旅退事理不同言路
旣開別彰聖德如或以山陵日近朔望不坐卽取次日亦
合舊規候過陵園還如法制臣叨司邦憲獲典朝儀儻遇
事而不言卽奉公而何取乞宣付中書門下商量曾獲經

久者

謝朱梁祖大硯瓦狀

蒙恩賜臣前件硯者伏以記室濡毫於楯鼻刀佩非多史
臣染翰於螭頭筒形甚小尚或文章煥發言動必書爲號
令之詞非典謨之訓如臣者坐憂才短行怯思遲自叨金
馬之近班常愧玉蟾之舊物豈意又頒文器周及禁林製
作泓渟規模廣滑閑宮苔而色古連沼石以光凝敢不致
在坐隅酣茹筆陣餘波漫潤便同五老之壺終日拂磨豈
但一丸之墨如承重寶倍感深恩

不應改國號議

殿下宗室勲賢立大功於三世一朝雨泣赴難安定宗社
撫事因心不失舊物若別新統制則先朝便是路人熒熒
梓宮何所歸往不惟殿下感舊君之義羣臣何安請以本
朝言之則睿宗文宗武宗皆以兄弟出繼卽位柩前如儲
后之儀可也

請准馬縕奏卽令撰謚冊議

伏以別制四廟徵漢室以定儀崇上尊名詳謚法以取證
伏覩歷代以來宗廟成制繼襲無異沿革或殊伏惟陛下

金石錄卷之二
十四
應運開祥體乾覆物纘紹之德咸頌聖於鴻圖孝思之心
乃垂光於帝範馬縞所奏禮有桉據乞下制令馬縞虔依
典冊以述尊名

長蘆崇福禪寺僧堂上梁文

祖令西來尺葦盡包於沙界聖圖南渡巨楹兩創於覺筵
自迦葉正法眼之單傳有壁觀婆羅門之故址翩翩隻履
去少林未有千年翼翼精廬徙滌口纔逾二紀圮於兵燼
莽爲礫區旃檀化聚棘之林鯨象失棲禪之地旋更七稔
未辦三椽潛庵老師五葉派下中興百尺竿頭進步得皮

得髓面壁正是前身利物利人當機勇施毒手非有遼天
之作畧豈能掃地以更新再續天聖之遺規喜遇登師之
同里衆緣自合紛艤筏之川流羣役並興環斧斤之雷動
要使宗風之峻立首圖雲衲之安居練吉日以鳩工峙閣
模而復古於茲大作爐鞴皆令直造根源展鉢鋪單不離
日用鍛佛煉祖總在堂中摩尼峯前突見飛翬之在目菩
提橋畔會逢立雪之齊腰旣新高廣明曠之基當知淨智
妙圓之體不立文字痛著鈴槌連牀上跳出栗棘蓬柱杖
下敲得麒麟子味永安之記常思紐草之高風造雪峯之

門必契流香之妙趣聊陳六詠助舉雙梁 東袞袞長江
一葦通再續千燈融佛日依然五葉振宗風 南十方禪
雋總包含認得老胡真鼻祖各尋慧可結同參 西飛櫳
危棟接雲霓重成鷺席搃禪鼓永洗狼煙罷戰鼙 北回
龍山繞煙林碧雙手翦除荆棘場空拳擎出瞿曇宅 上
參天喬木元無恙非臺鏡照大千機無繞墻高三百丈
下葱嶺路頭連綠野室裏俱承刮膜方板頭誰覓安心者
伏願上梁之後叢林萬指之安棲蘭若千年之不壞人
人自心見性箇箇與佛齊肩蘆葉飛花認的的祖師之旨

淮流成帶祝綿綿宗祏之休

梁啓聖匡運同德功臣淮南鎮海鎮東等軍節度

使淮南浙江東西等道觀察處置營田招討安

撫兼鹽鐵制置發運等使開府儀同三司尚父

守尚書令揚杭越等州大都督府長史上柱國

吳越王錢公生祠堂碑

維有梁之撫運也皇靈闡乎區外大禮昇於土中元亨利貞飛龍據在天之位聰明神武流烏當受命之符山川出雲河洛開奧藪魑魍夏鼎以奸銷禱杌窮奇格舜干

而心服於是南踰駱越北暨辰韓東極滄渭西臨黑水莫
不來庭捧贊厥角獻琛譯有外邦貢無虛月谷風嘯虎膠
庠奏樂職之詩山礮射牛封禪草禮官之議皇帝尚或謙
沖至德兢畏萬幾日昃忘勞宵分輟寐弗矜弗伐恒以百
姓爲心雖休勿休能使三時不害務敦其實所寶惟農以
麟鳳鷗鷺下科用黍稷稻粱爲上瑞君倡臣和草偃風
行克勤之心率勵於邦國固本之德浹洽於吏民天下翕
然頌聲斯起越五年夏四月上坐便殿顧謂翰林學士守
尚書右司郎中知制誥臣李琪曰朕有寶臣國之巨棟加

地進律雖圖伯舅之功嚴像立祠尚慊繙黃之願去歲杭
越等州軍府將吏士民耆艾列狀以吳越王錢鏐惠及於
物恩結於人願立生祠式光異政今我俞允顯其勲勞汝
爲好辭以永嘉聞微臣俯伏奉詔兢兢莫圖懼玷厥庸弗
任其職臣伏聞高辛氏得天之道實舉龐鴻伊耆氏象日
之明亦詢朱虎況乎戎衣定國革路興邦非哲后無以建
不圖非偉人無以康大業灌壇風雨佐聖室之宏規萃鼎
鹽梅集商王之景命吳芮起鄱陽之衆寶融興隴右之師
並翊天飛咸開帝緒其有連衡接武並駕齊驅昭昭然爲

國元勲合符英佐者卽今啓聖匡運同德功臣淮南鎮海
鎮東等軍節度使淮南浙江東西等道觀察處置營田招
討安撫兼鹽鐵制置發運等使開府儀同三司尚父守尚
書令揚杭越等州大都督府長史上柱國食邑二萬戶食
實封一千七百戶吳越王卽其人也公名鏘字具美其先
本彭城人也緬維英緒實肇遐源或標舉精神擅表儀於
晉魏或元通夢想冠雄勇於齊梁餘烈具存洪源遂廣大
王父諱沛累贈尚書左僕射王父諱宙累贈太師烈考諱
寬累贈中書令並稟粹地靈騰英岳秀百祿是荷爲積慶

之家五世其昌啓莫京之裔誕茲人傑貽厥孫謀公卽中
書令之嫡長子也幼而通理有岐嶷之姿長而不羣抱清
明之德雷泉英槩金宿精光洪鐘非戛擊之音大玉非磨
礲之器鷹瞵八表虎視三江魏帝目爲人雄晉后謂之王
佐屹風稜於氣表華嶽五千豁宇量於胸中雲夢八九厥
初以永嘉東渡世德繼昌分京公暨日之枝襲懼祖涵雲
之派緬惟浙右邑號臨安西連天目之峯東接秦巒之勢
雙川噴雪逕石鏡之清光萬岫參寥孕官山之王氣公克
膺靈秀載誕雋賢始囊螢於桑蓋之陰終奮劍於漚麻之

地時屬唐朝季末歷數將移戎馬生郊蜚鴻滿野公遂相
時而動憫物興嗟爲國平兗與民定亂散家財而養士訓
父子以爲軍楚卒八千徒矜組練梅鋗十萬浪號熊羆指
揮而立致風雲叱咤而坐移山嶽復值江南搔擾溪洞興
妖隣兗則極目朱眉巨憝則滿郊白幟小則倪知新朱實
之輩據險隘以蜂屯大則黃巢尚讓之徒掠藩方而虎噬
公乃旋分驍銳密運機鎗抉鼠穴以梟夷突豺牙而破軫
自此軍威益振號令愈明輔本郡之政經統八都之紀律
然而辛勤百戰平定四兗方澄兩浙之波瀾盡掃十州之

氣浸積田穰苴之威望峻鄒元帥之雄名故能大建勲庸
榮超崇極頃歲浙東觀察使劉宏者旌荷害馬齊充逋
脫身羣盜之中潛寵察廉之位妄以金刀自識潛蓄奸謀
忽萌吞并之心繼犯青疆之地先焚漁浦次刦九鄉或聚
犬衆於七州或恃狐鳴之數萬公躬臨矢石手運戈矛一
呼而瓦振長平屢戰而屍墳濰水連擒昆弟悉斬魁渠或
跋寨以全坑或單衣而夜逸中和五年公統領兵士遠過
重山築壘進軍攻圍日蹙逆首望風逃遁尋於巡管收擒
公乃手劍旗亭以謝戎庶其次光啓三年春鎮海軍節度

使周寶以釁生親戚旄節播遷公憤其黜逐帥臣志期翦
戮於是大陳卒乘運赴朱方迎請藩侯敬事如舊而薛朗
巢危食盡遂就活擒牲於靈柩之前以雪幽明之憤此際
蔡寇孫儒鯨吞夥歛謂磔沟川楊行密窘甚折骸乞師救
命公乃三路餽食兩面助兵克清霧市之妖遂解晉陽之
急乾寧三年威勝軍節度使董昌是公匡戴坐擁節旄不
遵良佐之箴規遽惑妖人之詭譎而又淫刑虐殺人神不
容興罪浞之逆謀僭羅平之僞號公往回百諫竟拒忠言
遂奉前朝詔書委其討伐隣兗行密見利忘義怙亂朋奸

廣裔豺狼攻圍城壘公仗順討逆奮一當十戮梟獍於近
郊破鯨鯢於檣率挫行密而奔仁義走陶雅而竄田穎然
後徑赴稽山親平禹穴出軍民於湯炭灑士庶以膏霖騰
萬口之歡聲溢千門之喜氣前朝乃就加公掌武之秩錫
地之榮分四騎之碧油佩兩藩之金印周旋二紀翦落四
兇始得安吳越之封疆泰牛女之耕織若夫天下有急王
孫遂立於壇場日中而趨司馬亟頒於符節其間水深則
蛟產林大則蠹生提封漸廣於支巡牧守難齊於忠盡其
有如霅川李師悅雙溪王壇新定陳詢瀔水陳章溫江張

惠縉雲盧佶蘋渚高澧及外都叛將徐館許再思之輩或軍行末校或草澤逋民發跡戎轍素無顯效蒿艾豈棟梁之器犬彘懷噬主之心悉被淮甸回邪潛爲誘煽負本藩之提挈辜解縛之深恩竊弄干戈自貽覆餗公山苞朽壤海納昏波許雍齒以自新待焚崇以不死俟其惡盈貫滿不得已而用兵纔舉偏師處處摧拉皆是公臨機獨斷決勝萬全威震懾於江濤勲格抗崇於山阜固已書於甲令列在世家處台鉉而彌光受形旅而不愧矣公宣慈稟性明粹在躬五精妙察於次躔六部旁該於厯數帝師劉

向懸知白水之符國士殷馗預識黃星之瑞是以高梧傾
鳳大廈占鳥拱牲幣以宗堯率謳歌而戴舜先是上在藩
邸公潛輸大義密奉上交湖九萬里之靈飈挺三十年之
神契豈比河西已定尚興遊帝之談陔下將平始拒狂巫
之說不然則何得印方似斗言出如綸適拜前恩仍加後
寵皇帝踐祚之元年夏五月定封賞之數報締構之勲命
右金吾衛大將軍安崇隱馳傳進封公爲吳越王秋八月
以克震天威屢陳戎捷授公兼淮南節度使二年皇帝肅
郊禋之禮灑雨露之恩奠玉燔柴所以昭事上帝疏爵燾

土於是宏獎諸侯以公爲守中書令復命刑部尚書姚洎持節行吳越王冊禮春三月以公奉菁茅之貢遠述職方陳玉帛之儀恒先宰旅進公爲守太保秋八月以公解長洲之圍復震澤之郡用匡九合宜總五兵拜公爲守太尉兼中書令五年以公儀表藩垣經緯文武當呂望四征之重居伊尹百揆之先召公爲守尚書令朝廷復以公累朝碩量開國宏勲有同心同德之功著十亂八元之業威畧主列藩盟猷忠貞爲社稷金湯昔周文王得渭水之賢猶尊極品我國家倚扶天之柱宜峻殊恩遂冊拜公爲尚父

仍加井邑實封以崇異禮昔杜元凱之平吳會止鎮一州
昆陽侯之定淮夷不階三事未有光昭大典卓犖鴻恩輶
軒相襲於道途簡冊交馳於冕弁三十二人之畫像旌顯
非多五十四縣之疏封迴旋尚小羅旃設戰誓嶽盟河廊
廟之隣哉臣哉勲名之大矣神矣公以富強之俗訓驍勇
之兵戈艦三千旌門百萬水犀鮫革甲光照互父之山秋
鴈魚麗陣勢駭蚩尤之國加以竹頭木屑之用鹽田滄瀆
之饒有益軍須莫先戎費愛人若已決事如神嚴明有拔
蕘之功聽察得分縗之理除殘去弊守正申威盡冠不犯

於四封列貨羞談於二價遂使江湖之上棹有歌聲斗牛之間獄無冤氣矧又敬崇穹昊虔奉繙黃百靈輸穀穀之祥萬庾洽京坻之稔用天分地務稽勸農保慈儉以律身變鳥齒而收利穰穰多稌人爲萬石之家膾膾良田力有千金之堰風謠逸豫禮讓興行君子謂之樂郊神人稱其福地豈可使燕山車騎空銘幕府之勲齊國相君不頌祠堂之美微臣仰膺睿旨俯扣庸音敢書無愧之詞用紀不磷之績庶使披文相質與日月而俱懸積德累功共江山而更遠是旌民愛式表君恩謹爲銘曰

彼穹初圓補石而正下土未乾決河而定我后勑業惟公
佐命內贊皇極外綏戎柄雄雄偉人元象降神山海其度
麟鳳其身地開茅土天授經綸疊封異姓屢委洪鈞多藝
不矜好謀而懼養士分甘尊賢吐哺厯數該博襟靈穎悟
識辨形雲先知聖祚昔之未遇始用英才凌松渡浙拂電
紫雷宏昌瓦解儒密冰摧狼精夜隕虎幄晨開今也元勲
擁旄三鎮劍騎山積戈船海振冊以車輶賜之膳脹烈烈
威風專征仗順惟公之明間世而生片言折獄半面知名
吏絕巧詆人無匿情政刑一槩如水之平善誘黎甿服勤

耕稼攜稚就豐佩牛歸化再熟梁稻八蠶桑柘足食足兵
述方而霸軍民感惠易世於茲哀矜耆艾撫養憮嫠如母
之愛如父之慈告於天子願啓生祠厥祠旣崇邃宇加飾
彰民之心表公之德上帝錫祉諸侯取則取之伊何勿擾
勿亟絲綸有命琬炎徵文爰馳上列式獎鴻勲浚義才子
安陽令君永標今古名播萬春

欽定全唐文卷八百四十八目錄

李疇

請禁陵封內開掘奏

李崇遇

請四品以下官准贈奏

王澄

梓材賦

請禁不務農桑奏

孔莊

請擇郡守疏

趙和

對縣令不修橋判

對私僱船渡人判

王鬱

請定覆奏決囚奏

請令諸司各詳令式奏

呂明龜

少帝謚號議

段禹

請定五廟議

冊秦王儀注議

劉虞膺

上時務奏

周知微

請復議典奏

請除落正罪外科決輕贓奏

請令州郡抄法書奏

請明商賈開驗奏

請禁官曹被刑疏

請禁告訐疏

曹允昇

請禁府郡以僕使代書判奏

蔡同文

請增七十二賢酒脯奏

盧華

請旌賞外官能理冤獄奏

蕭希甫

請求言選吏以消災沴表

請條流縣令刺史得專斷獄奏

請釋天成以前罪人奏

請禁州府推委刑獄奏

請置明律科奏

崔琮

鳳翔李業河東李拭並加招討使制

請置病囚院疏

路航

詳斷張延雍等奏

申嚴祀典議

李光憲

請置郊壇齋屋奏

請復常參官上任舉人自代例疏

李愚

唐末帝卽位冊書

請以降誕日爲千春節奏

勸韓建討賊書

欽定全唐文卷八百四十八

李疇

疇後唐長興元年官宗正丞

請禁陵封內開掘奏

京畿內列聖園陵自兵亂後來人戶多於陵封內開掘燒
磚窯竈掘斷岡阜驚動神靈此後請嚴切禁止奉陵州縣
凡有封內窯竈並宜修塞

李崇遇

崇遇後唐長興元年官尚舍奉卿

請四品以下官准贈奏

竊見文武百官一品已上薨謝者皆有贈賚自四品已下無例施行請特定事例以表無偏

王澄

澄後唐長興二年官大理少卿

梓材賦

以理材爲器如政之術爲韻

猗嗟掄材者梓必將有以掄者動不妄施材者用之爲美塗其丹腹之色契乃斷雕之理成乎器用孰不勤止則知能者軌物其利博哉達於道必獲乎象酌於事實在乎材

材罔不奇戒乎不知應時可重匪飾胡爲須度長而絜大
諒方矩而圓規役是司者勉矣厥宜亦猶德必輔人材不
假器人失德而奚取器非材而奚利材濫則過於粹人德
乖則失乎爾位其有取非輪桷性實散樗以不材而見棄
思入用其焉如豈比山有之亦修短惟準工度也而削理
有餘旣罕節而抱直成大厦之厥居者哉夫如是則工以
理材爲難國以教人爲聖聖體材而存道材象道而成政
宏之在人慎乃出令藏器俟時人罔越思達乎至極欽哉
有司惟試可矣以材校之守而弗失其德秩秩以人觀材

以材觀實非獨陳伊周之宏義將以翊我唐之政術儻小
材之不遺願雕煥於茲日

請禁不務農桑奏

陛下御極以來大稔於此時無水旱歲有豐登所以民去
農桑士思遊情或機巧以趨利或宴樂以棄時且一夫不
耕或受其飢一婦不織或受其寒者而況鄉閭之內城郭
之中競削錐刀罔知本末或鼓舞於村落或謳歌於市壘
實繁有徒觸類而長若非禁止漸恐滋彰

孔莊

莊後唐明宗朝官刑部員外郎

請擇郡守疏

臣聞漢宣帝云與朕共治天下者其唯良二千石乎今國家每擇郡牧唯賞軍功慮於治民未盡其旨爲人求瘼責在參佐則庶幾近理願畱天聰俾慎揀焉

趙和

和後唐明宗朝爲西川雲州使

對縣令不修橋判

長安萬年縣坐去歲霖雨不修城內橋被推按

金文卷之二
訴云各有司存不伏科罪

中京帝宅上洛星橋宮城俯臨九重密邇康莊或斷一切
停畱架海鼈鼉誰看往迹填河烏鵲不見新營冠蓋相喧
遏紅塵而不度車徒競擁駐白日而移陰修構既在科須
差遣誠歸正典事合屬於將作不可責以親人訴者有詞
請停推劾

對私催船渡人判

洛水中橋破絕往來渡縣令楊忠以爲時屬嚴
寒未可修造遂私催船舫於津所渡人百姓杜

威等連狀舉忠將爲幹濟廉使以忠懦弱不舉職事以邀名欲科不伏

上洛飛湍中橋施構參差危柱若星影之全開斷絕浮梁似虹光之半起望九衢之車馬未見川流瞻兩岸之風煙更疑波委揚忠宣風帝輦作宰神州以修造之辰當沴寒之節私雇船舫公然來往論惠雖是恤人語事更非濟物且雨畢理道水涸成梁莫不率由舊章抑亦編諸甲令故違憲法自寘刑科廉使以懦弱繩愆正符厥理杜威以幹濟連狀未識其宜

王鬱

鬱後唐明宗朝官大理少卿

請定覆奏決囚奏

准貞觀五年八月二十一日勅極刑雖令卽決仍三覆奏
在京五覆奏決前三奏次日兩奏惟犯惡逆者一覆奏著
於格令又准建中三年十一月十四日勅應決大辟罪在
京者宜令行決之司三覆奏決前兩次決日一奏又謹按
斷獄律諸死罪囚不得覆奏報下而決者流二千里卽奏
報應決者聽三日乃行刑若限未滿而行刑者徒一年伏

進冊皇帝御內殿高品引王入立於位高品宣制讀冊王
受冊訖歸院亦無乘輶謁朝之禮臣按五禮精義云古者
皆因禘嘗而頒爵祿所以示無自專稟之於祖宗也今雖
冊命不在烝嘗然拜大官封大邑必至殿廷敬慎之道也
今當司欲準開元禮其日秦王服朝服自理所乘輶車備
鹵簿與羣臣俱集朝堂就次受冊訖至應天門外奉冊置
於載冊之車秦王升輶出謁太廟訖歸理所儀仗鹵簿如
來時之儀

劉虞膺

虔膺後唐長興二年官遼州和順縣令

上時務奏

里俗有父母在而析財別居又宗族之間或有不義凌其孤弱者請行止絕

周知微

知微後唐長興二年官刑部郎中

請復議典奏

開元刑法格有後格破前格之載無後勅破前律之文今雖以律定罪以格禁違復有八議之條廢來斯久請准舊

制令居八議之條有犯死罪者令所司准法先奏請行議
典

請除落正罪外科決輕贓奏

臣每詳覆案文靜究贓罪條件或有因緣勘鞫滋漫告陳雖廣訟論漸異根本其間有物關獻遺事同情異或果實紙筆之徒或絲履茶藥之類逐色目計錢不及三二百聚都數不過四五千爲案牘之微贓傷朝廷之大體引律二罪俱發以重者論不累輕以加重請非正論事條外定贓之時並許除落

請令州郡抄法書奏

請藩方州郡皆令抄寫法書每遇詳刑須憑條格旣無失入自絕銜寃

請明商賈開驗奏

近年關防商賈不憑司門公驗關禁之設國有舊章請諸司舉行之

請禁官曹被刑疏

竊以唐有天下垂三百年聖帝明君覽宏綱而御極忠臣賢佐法古道以贊時兩漢已還厯代罕比雖國有中否之

數人無厭德之言果致陛下紹開中興繼承大業將欲永
光帝載而猶動守典刑伏見州縣官僚被人論訟始行追
取未辨是非稱呼不去其官曹枷鎖已拘於道路所以上
無恥格下絕恭敬有玷盛明實駭觀聽此後凡有官緒可
稱所訟罪名未正伏請祇令監守皆在法司俟曲直稍分
卽荷校無憚所貴坐法者知國章有節司刑者表守律無
踰

請禁告訐疏

竊覩近勅慮有官吏割剝下人許百姓陳告民之愚下罔

金部全集卷之二
認宸衷或据摭纖微或受人驅駕事多憑虛適足爲亂有過者固合當辜誣罔者請議刑憲庶或知止免瀆風化

曹允昇

允昇後唐長興三年官太常丞

請禁府郡以僕使代書判奏

使府郡牧例以隨身僕使爲中門代判通呈等名目極多皆恃勢誅求不勝其弊伏請特行止絕如藩侯郡守不能書札請委本判官代押其職務監臨請差本處衙院官吏庶得漸除踰濫兼使州奏薦判官多非才行或以賄賂求

進今後奏薦請令本人隨表至京令所司比驗

蔡同文

同文後唐長興三年官國子博士

請增七十二賢酒脯奏

伏見每年春秋二仲月上丁釋奠於文宣王以充國公顏子配坐以閔子騫等爲十哲排祭奠其七十二賢圖形於四壁面前皆無酒脯自今後乞准本朝舊規文宣王四壁諸英賢畫像面前請各設一豆一爵祠饗

盧華

華後唐長興四年官刑部員外郎

請旌賞外官能理冤獄奏

臣竊以欽恤者聖人之大德畏慎者臣下之小心倘不怠於交修庶自叶於理道伏遇陛下靜符元化動修至仁八紘無幽枉之人四海有昇平之望但以人非誘勸事罕專精將欲仰副憂勤實願再明條制伏見本朝故事凡內外官司有能辨雪冤獄活得人命者特書殊考非時命官多難已來此道漸廢旣隳賞典難得公心伏乞明降勅文顯示中外自此不繫正攝官吏能辨雪冤獄全活人命斷割

纔訖旋具奏聞考較不虛時與超轉如或滯畱不具申奏及虛妄冀希恩澤其所任司長本判官並請重加殿罰

蕭希甫

希甫宋州人少舉進士爲梁開封尹袁象先掌書記後唐同光初爲駕部郎中遷諫議大夫兼陘函使以希旨誣殺豆盧革拜左散騎常侍後告密事發貶嵐州司戶參軍長興中卒於貶所

請求言選吏以消災沴表

臣聞天地助順神理福謙既物性之則宜何虛心之致誤

伏惟陛下自統臨四海勤恤萬方每崇恭儉之風嘗布仁慈之德卽合陰陽無爽災沴不生百穀豐盈五兵偃息今乃川瀆決溢水旱愆違必恐是調燮未乖祭祀未潔軫吾君宵旰之慮負陛下覆育之恩臣實痛心誰迴愧色伏乞特頒明詔下訪有司詢其消遣之方採彼妖祥之本應是前王古帝往哲先賢或有遺祠但存舊址在祀典者咸加嚴勅稟靈通者盡畧修崇悉遵虔肅之誠無惰精祈之懇然後別宣長吏側聽庶民稍闢疾苦之由須罄撫循之策冀其昭感仰贊昇平

請條流縣令刺史得專斷獄奏

四方刑獄動皆上聞不獨有紊於公朝兼且淹延其獄訟
伏乞條流縣令凡死罪已下得專之刺史部內有一吏一
民犯罪得專之觀察使部內有犯罪五人已下得專之如
此則朝廷事簡見萬乘之尊矣

請釋天成以前罪人奏

臣叨蒙擢任官忝諫司所職重難兼知匦院但有關於至
理卽欲合於無私冀竭丹誠仰裨元造臣伏見自同光元
年十月九日先朝收下汴州後至今年四月一日已前兵

革盛興亂離斯極典章幾壞刑政莫施每於紛擾之間甚有殺傷之苦非惟州縣長吏或濫誅夷直至鄉里居民互爲殘戮挾私怨者公行白刃將快忿心怙強力者豈聞丹書惟欣得志掠妻女以轉賣劫財貨以平分如此之流應遍天下伏惟皇帝陛下薦恢帝載光啓鴻圖伏思自陛下臨御以來皇綱漸正有功者盡賞有罪者咸誅閭外將清朝中無事今則歐函已再修整欲具進呈必恐擡出外邊施行已後遠近披訴受狀至多但慮京國諸司囚禁便蒙填委則至上虧皇化有玷國風其次更慮勲貴親賢或閑

對訟便煩讞議或礙刑書若今事有否臧卽便政移曲直
以臣愚見欲自元年四月二十八日昧爽已前罪無輕重
應大辟已下罪一切釋而不問庶得刑清俗泰國富民康
咸欽不宰之功永奉維新之化

請禁州府推委刑獄奏

府州官吏不務守官咸思避事每覩微小刑獄皆是聞天
不惟有紊朝綱實恐淹延刑獄

請置明律科奏

臣聞禁暴亂者莫先於刑律勤禮義者無切於詩書刑律

明則人不敢爲非禮義行則時自然無事今詩書之教則業必有官刑律之科則世皆莫曉近者大理正宋昇請置律學生徒雖獲上聞未蒙申舉伏乞特頒詔旨下付國庫令再設此科許其歲貢仍委諸州各薦送一兩人就京習學候至業成便放出身兼許以卑官卻還本處則率土之內盡會刑書免禍觸於金科冀咸遵於皇化

崔琮

宗後唐長興中官濮州錄事參軍

鳳翔李業河東李拭並加招討使制

門下邊境未寧固資於選帥輪轅適用必在乎與能無煩易地之勞各副長城之委鳳翔節度使檢校刑部尚書李業生自將門久知虜態悅詩書而不倦索韜鈐而甚精河東節度使檢校禮部尚書李拭早膺儒冠克擅文場幼挺瑚璉之姿尤通冉季之政並累更重任必播能名或居劇塞而練卒討羌或領北門而剋已訓士皆勤勞備著功効居多朕以右輔之新拓土疆是資綏緝大鹵之連控戎落尤藉隄防或更戶封之崇或仍舊貫之美各膺新命無替

前勞

請置病囚院疏

諸道獄囚恐不依法考掠或不勝致斃翻以病聞請置病囚院兼加醫藥

路航

航後唐長興四年太常博士

詳斷張延雍等奏

准格詐爲制勅僞行符印罪當絞其令史吳知已准格重杖一頓處死本司官祠部郎中王承弁初不精詳致彼罔冒准詐僞律合杖九十如已去官則減等今王承弁已別

除官據格放罪門下令史陳延祐雖不與吳知己同情有
涉屬託准律杖一百放堂後官何康初言屬託不至瑕疵
准律杖罪呂道昭李玩呂圖事雖關連別無深罪准格並
合釋放諫議大夫張延雍補蔭自有格文催促失於事體
言苛剋之語雖是見人據引驗之詞蓋亦虛指伏候勅處
分

申嚴祀典議

比來小祠已上公卿皆著祭服行事近日惟郊廟太微宮
具祭服五郊迎氣日月諸祠並祇常服行事兼本司執事

人等皆著隨事衣裝狼籍鞋履便隨公卿升降於壇壝按
祠部令中祠已上應齋郎等升壇行事者並給潔服事畢
收納今後中祠已上公卿請具祭服執事升壇人並著具
緋衣幘子今臣檢禮閣新儀太微宮使卯時行事近年依
諸郊廟例五更初便行事今後請依舊以卯時

李光憲

光憲後唐明宗朝官太子賓客以禮部尚書致仕應順元
年卒

請置郊壇齋屋奏

臣聞國之重事惟祀與戎四時薦享之儀合以敬恭備禮
每祭三公具列御史監臨行事羣官皆宿壇廟或屋宇不
庇風雨或止泊投寄村園無戶牖以防虞無薦席以藉地
苟傷棲旅難責精虔禮或不周福將安望乞今量事添置
庶保肅恭

請復常參官上任舉人自代例疏

將垂帝範在守於舊章欲敘彝倫合循於典故實大朝之
理本蓋有國之常規臣嘗覽列聖實錄伏見建中元年正
月五日勅旨應內外常參官後三日舉一人自代者編諸

簡冊冀拔賢良是資教化之方以盛簪裾之列爰於近歲
稍易舊規臣請明下勅文許行建中故事所冀振纓在位
咸懷舉善之心棫樸興歌漸致得賢之美

李愚

愚字子晦自稱趙郡平棘西祖之後初名晏平舉進士又
登宏詞科授河南府參軍梁末帝嗣位累擢司勲員外郎
入後唐爲翰林學士同光三年魏王繼岌征蜀請爲都統
判官蜀平就拜中書舍人改兵部侍郎長興初拜中書侍
郎平章事兼吏部尚書閔帝嗣位進位左僕射清泰初加

特進太微宮使宏文館大學士後罷相守本官二年卒

唐末帝卽位冊書

維應順元年歲次甲午四月庚午朔六日乙亥文武百寮
特進守司空兼門下侍郎同中書門下平章事充太微宮
使宏文館大學士上柱國始平郡公食邑二千五百戶臣
馮道等九千五百九十三人上言帝皇興運天地同符河
出圖而洛出書雲從龍而風從虎莫不恢張八表覆育兆
民立大定之基保無疆之祚人謠再洽天命顯歸須登宸
極之尊以奉祖宗之祀伏惟皇帝陛下天資神智神助機

權奉莊宗於多難之時從先帝於四征之際凡當決勝無不成功洎正皇綱每嚴師律爲國家之志大守臣子之道全自泣遺弓常悲易月欲期同軌親赴因山而自鄴王承桃奸臣擅命致神祇之乏饗激朝野以歸心使屈者伸令否者泰人情大順天象至明聚東井以呈祥拱北辰而應運由是文武百辟岳牧羣賢至於比屋之倫盡祝當陽之位今則承太后慈旨守先朝遠圖撫四海九州享千齡萬祀臣等不勝大願謹上寶冊稟太后令奉皇帝踐祚臣等誠慶誠忭謹言

請以降誕日爲千春節奏

臣覽國史開元十七年宰臣張說源乾曜奏改朔體元固聖主之能事良辰嘉會亦俗化之大端蓋周人有合宴之儀漢代有賜酺之律所以歌詠皇德啓迪人情至若泛菊高堂遂號重陽之節流杯曲水永爲上已之游在昔偶行於今不改豈足比君臨四海運應千年畫璿圖而敬授民時秉玉燭而節宣和氣身爲律度德合乾坤仰爲樞電之祥最是寰區之樂願從人欲特創節名封函尋示於允俞自此永編於令式舊章斯在列聖嘗行將有擬倫預慚膚

淺伏惟皇帝陛下勤遵典法克叶祖宗方今玉鏡高懸睿
樞廣運告成功於朝社正大禮於宮闈是以舞干率服於
三苗班瑞雍熙於萬國臣等以獻歲元正之月是猗蘭降
聖之辰梅花映雪於上林椒酒迎春於祕殿江邊野老願
鑾輶之時巡陌上遊童醉堯樽而獻祝請於是月特舉節
名副與人共樂之言致率土交歡之義臣等謹按元宗皇
帝以八月五日載誕張說等請以其日爲千秋節臣等不
揆庸暗輒體憲章請以來年正月降聖日爲千春節

勸韓建討賊書

僕關東一布衣耳幸讀書爲文每見父子君臣之際有傷
教害義恨不得肆之市朝明公居近關重鎮君父幽辱月
餘坐視凶逆而忘勤王之舉僕所未諭也僕竊計中朝輔
弼雖有志而無權外鎮諸侯雖有權而無志惟明公忠義
社稷是依往年車輶播遷號泣奉迎累歲供饋再復廟朝
義感人心至今歌詠此時事勢尤異前日明公地處要衝
位兼將相自宮闈變故已涉旬時若不號令率先以圖反
正遲疑未決一朝山東侯伯唱義連衡鼓行而西明公求
欲自安其可得乎此必然之勢也不如馳檄四方諭以逆

順軍聲一振則元凶破膽旬浹之間二豎之首傳於天下
計無便於此者